

Broj: UP2ŽV-07-65/25
Sarajevo, 03.09.2025. godine

ПРИМЉЕНО			
11-09-2025			
Организациона јединица	Класификациона ознака	Рачни број	Број прилога
1-2-50-577-3/25		6/25	

Žalbeno vijeće pri Vijeću ministara Bosne i Hercegovine, rješavajući po žalbi ,
izjavljenoj na Rješenje Direkcije za civilno zrakoplovstvo Bosne i Hercegovine, broj: 1-2-50-577-3/25 od 12.06.2025. godine, na osnovu čl. 215. i 228. stav (1) Zakona o upravnom postupku („Službeni glasnik BiH“ br. 29/02, 12/04, 88/07, 93/09, 41/13 i 53/16), te člana 28. st. (1) i (2) Zakona o slobodi pristupa informacijama na nivou institucija Bosne i Hercegovine („Službeni glasnik BiH“ broj 61/23), na sjednici održanoj dana 03.09.2025. godine, donosi

RJEŠENJE

Žalba , izjavljena na Rješenje Direkcije za civilno zrakoplovstvo Bosne i Hercegovine, broj: 1-2-50-577-3/25 od 12.06.2025. godine, **odbija se kao neosnovana.**

Образложење

Dana 29.05.2025. godine, je podnijela zahtjev Direkciji za civilno zrakoplovstvo Bosne i Hercegovine, kojim traži da joj se dostave informacije kako slijedi:

- Da li je ikada i za jednog zaposlenog BHDCA, dok je koristio zakonsko pravo odsustva sa posla radi bolovanja, upućen email drugim zaposlenim sa zahtjevom da mu/joj ne dostavljaju e-maile, odnosno da je/ju ne stavljaju u kopiju e-maila? Informacija se odnosi na sve zaposlene, ten a državne službenike koji rukovode organizacionim jedinicama unutar BHDCA.
- Da li je ikada ijednom zaposlenom u BHDCA, dok je koristio zakonsko pravo odsustva radi bolovanja, promjenjen status u predstavljanju u međunarodnim tijelima? tj., da je umjesto tog lica koje je na bolovanju imenovano drugo lice? Informacija se odnosi na sve zaposlene, uključujući i , pomoćnicu generalnog direktora Direkcije za civilno zrakoplovstvo Bosne i Hercegovine.
- Da li su zaposleni koji su koristili/koji koriste zakonsko pravo odsustva sa posla radi bolovanja, o promjeni statusa u predstavljanju u međunarodnim tijelima (da su zamijenjeni, a ne da mijenjaju u odsutnosti) o tome obavješteni I kojim putem, te da li im je dato obrazloženje za takvo postupanje. Ukoliko je odgovor potvrđan tražim da mi dostavite dokaz, ukoliko je isti odričan, potrebno je da navedete da je odričan. Obrazloženje koje nikada nikome nije dostavljeno, ne tražim da dostavljate ni meni traženim rješenjem, posebno jer bi se radilo o obrazloženju post festum (nakon postupanja I dostavljanja obavještenja putem emaila).

Postupajući po podnesenom zahtjevu Direkcija za civilno zrakoplovstvo Bosne i Hercegovine je Rješenjem broj: 1-2-50-577-3/25 od 12.06.2025. odbila pristup informacijama po zahtjevu iz razloga što isti podliježe ograničenjima propisanim članom 19. stav 5. Zakona o slobodi pristupa informacijama na nivou institucija Bosne i Hercegovine („Službeni glasnik BiH“ broj 61/23).

Nezadovoljna ovakvim rješenjem (u daljem tekstu: žaliteljica) izjavila je žalbu u kojoj između ostalog navodi razloge zbog kojih su joj informacije potrebne. Nadalje, žaliteljica navodi namjeru donosioca rješenja da spriječi žaliteljicu u ostvarivanju njenih osnovnih ljudskih prava sadržanih u Evropskoj konvenciji za zaštitu ljudskih prava i osnovnih sloboda koja se odnose na fer i pravično suđenje.

Po prijemu žalbe Žalbeno vijeće je konstatovalo da je žalba blagovremena, dopuštena i izjavljena od strane ovlaštene osobe, te zatražilo izjašnjenje Direkcije za civilno zrakoplovstvo Bosne i Hercegovine u vezi sa žalbenim navodima, kao i dostavljanje svih spisa po navedenom predmetu, a u cilju donošenja pravilne i zakonite odluke.

U dostavljenom izjašnjenju Direkcija za civilno zrakoplovstvo svojim aktom broj: 1-2-50-577-3/25 od 12.06.2025. godine ističe da je žaliteljici pobijanim rješenjem odbijen zahtjev za pristup informacijama iz razloga detaljno navedenih u obrazloženju pobijanog rješenja.

Žalbeno vijeće konstatuje da je žalba dopuštena, pravovremena i izjavljena od ovlaštene osobe.

Cijeneći žalbu i žalbene navode, kao i dokaze u dostavljenom spisu, Žalbeno vijeće je stava da je žalba neosnovana.

Uvidom u spis predmeta i osporeno rješenje, Žalbeno vijeće cijeni da je prvostepeni organ pravilno primjenio relevantne propise. Naime, članom 19. stav 5. Zakona propisano je:

“(5) Institucija BiH ograničit će pristup informacijama koje se tiču jednakosti stranaka u sudskim postupcima i efikasnosti pravosuđa, postupaka koje vode nadležni organi u prethodnom krivičnom ili disciplinskom postupku za vrijeme trajanja tih postupaka, osim ako posebnim zakonom nije drugačije propisano i ako bi se objavljivanjem informacije onemogućilo efikasno, nezavisno i nepristrasno izvršenje odluke ili sankcije institucije BiH.”

Shodno naprijed navedenoj odredbi Zakona, a imajući u vidu da je protiv žaliteljice pokrenut disciplinski postupak Rješenjem Agencije za državnu službu Bosne i Hercegovine, broj: 05-34-3-406-3/25 od 19.05.2025. godine, koji nije okončan, Žalbeno vijeće je stava da je prvostepeni organ pravilno primjenio člana 19. stav 5. Zakona kada je odbio Zahtjev za pristup informacijama, jer bi udovoljavanjem predmetnom zahtjevu došlo do povrede naprijed navedene odredbe Zakona.

Imajući u vidu naprijed navedeno ovo Vijeće je stava da je prvostepeni organ pravilno primjenio relevantne zakonske odredbe kada je odbio predmetni zahtjev, a posebno iz razloga što disciplinski postupak nije okončan.

Žalbeni navodi žalitelja paušalno navedeni prema stavu ovog Vijeća nisu ukazali na propuste ili nezakovitosti koje bi dovele do pobijanja rješenja. Naime, u postupku donošenja rješenja nisu učinjene povrede pravila postupka, činjenično stanje je potpuno i pravilno utvrđeno, i na kraju materijalno pravo pravilno primjenjeno.

Ovo vijeće smatra pravilnim i zakonitim postupanje Direkcije za civilno zrakoplovstvo u konkretnom slučaju, donošenjem rješenja kojim je odbijen zahtjev podnosioca primjenjujući naprijed citirane odredbe.

Cijeneći naprijed izneseno Žalbeno vijeće je zaključilo da je žalba neosnovana, te je shodno članu 228. stavak (1) Zakona o upravnom postupku, odlučilo kao u izreci ovog rješenja.

Pouka o pravnom lijeku:

Ovo rješenje je konačno u upravnom postupku i protiv njega nije dopuštena žalba, ali se može pokrenuti upravni spor. Upravni spor se pokreće tužbom kod Suda Bosne i Hercegovine u roku od 60 dana od dana zaprimanja ovog rješenja. Tužba se podnosi u dva istovjetna primjerka, a uz istu se prilaže ovo rješenje.



Dostavljeno:

- 2X Direkcija za civilno zrakoplovstvo, V kozarske brigade 18, 78 000 Banja Luka, (prvostepeno tijelo je dužno u roku od pet dana dostaviti primjerak rješenja žalitelju, te drugostepenom tijelu –Žalbenom vijeću dostaviti dokaz o uručenju Rješenja);
- a/a.